

Verbazingwekkend veraeltien

A-k vernemstig waere ewest a-k niet op een uutneudiging veur een bi'jenkomst van de wärkgroep dialecten van de lesselaccedemie in-egaon. Ik adde bèter mutten weten, maer ja . . . ik deeë 't wel en now bin-k de klos.

Mu-j eerstens een "mooi" dialectweurtien verzunnen, döör maken zi'j dan een liessie van met de 10 mooisten en van die tiene kiezen zi'j der dan weer drie uut die wi'j in een veraeltien mutten gaon verwärken.

Der bint now ienmaal van die ooby's die inies verrekte völle op wärk begunnen te lieken deur de tied en andacht die-j der an mutten gèven. Toen ik de drie weurties die ik mosse verwärken, op een ri'jgien ad ezet e-k der eerstens is verdwaesd naor zitten kieken en mi'j toen realiseerd dät graoperig ter ook tussen stond. Graoperig . . . ja ie weten wel . . . dät stokpeertien dät ik nog wel es van stal wille alen as mi'j de ebzucht van de maetskappi'je en dan veural 't grote greien van de zo-enuumde bèter gesitueerden met oge functies, weer is een keer te völle worren. Die eren en dames die onder andere in de zörgsector, de ulpverlening, woningcoöperaties en de dienstverlenende sector de ogere functies bekleden en die maer denken dät alles allenig um un dreien en zich onnumelijk belangriek vinnen. Ik wete dät 't zekers niet vernemstig is wat ik dät soort gasten toewense, maer geleuf mi'j . . . dät is gien *prettige Kärstdagen*. Ik wärke maer zes dagen in de wèke en op de zundag doe-k ook nog vri'jwilligerswärk. Dät doe-k bi'j een zörginstellink wöör dementerende olderen wonen. Maer as de medewärkers van die zörginstellink euren dät ik in principe absoluut tegenstander bin van al dät vri'jwilligerswärk, mu-j die mensen is veraldereerd zien kieken. Ie ziet ze denken . . . die vent is niet goed wies! *Klopt elemaole* . . . mooi laoten zo, maer ik kan now ienmaal niet anders denken dan dät betaalde banen bewust wörron wegbezuugd umwille van de efficiëntie van de instellingen um döörnao de open-evallen plaatsen weer in te vullen met vri'jwilligers. Dät kan nooit de bedoeling van de regelingen binnen ewest, maer a-j de bewoners niet wilt laoten stikken . . . wat mu-j dan? Maer as die rieke stinkers strakkies zelf ulpe neudig zollen ebben, denk ik niet dat dät ik döör an mèè zal doen.

Veraldereerd? . . . Ach 't leste oordeel is toch niet an mi'j.

Willem W. december 2014

Vertaldereerd = verbouwereerd /overstuur /van de kook

Vernemstig = verstandig / schrande

Graoperig = inhalig